

Ence la Pat sostegn I Minority SafePack

La jonta provinzièla à aproà a una la mozion del conseier ladin Bepe Detomas

Mendranzes - Enstadì l Consei provinzièl à aproà a una la proponeta de mozion del conseier ladin Bepe Detomas a sostegn de la scomenzadiva de regoeta de firmes (1 milion te l'Europa, amàncol 55.000 te Tèlia) per didèr dòl l projet "Minority SafePack" de la FUEN (l'organizacion europeèna de la mendranzes e gropes etnics autòctons en Europa), che perveit soraldut azions finalisèdes a favorir la

partecipazion de la persones de mendranzes naziònes al prozess deziònel politich, ence te nòtica de miorament de la legitimazion democratica de la politica e de la legislazion europeèna.

"L'emportanza de chesta scomenzadiva - disc Detomas - vegn ca soraldut da sia natura sora naziònela che permet de arseguir e valorisèr la tutela de la mendranzes a livel

european, engaissan na reflescion comuna e l'adozion de strumenc spartii e più percacenc ti desferenc Stac membres. La tutela de la mendranzes, aldèl de n prinzip costituzionèl fundamentèl, raprejenta un di pilèstres de nòc sistem de autogovern, che tel temp, de gra a l'adozion de politiches inovatives, l'ha sapù garantir na tutela efetiva, e ence adatèr e renovèr l'equilibrie delicat anter gropes linguistics, ence sostegnan sie protagonism e sia partecipazion ativa a la vita de la comunanza. Noscia storia ne insegna cotant che sie fundamentèl stèr ti prozesc naziònei e europeans a na vida organica, se confrontèr sun più livie a na maniera prospetiva e costrutiva e se fèr cèria de na reflescion comuna aldò de n criterie de comparazion. L Trentin, desche model prezios de solidarietà e convivenza pazifica, vel portèr inant na pèrt propositiva ence su chesta tematica, didan dò l bon ejit de la scomenzadiva de gra a la regoeta de firmes e arsegaran te chesta maniera

la tutela efetiva de la mendranzes te l'Europa, con l'augure che ence tel derit european posse ruèr ite e vegnir fac fora standard minimai de tutela de la mendranzes."

La jonta se à palesà "deldut a una" sul contegnù de la proposta de mozion e donca d'acort a se ativèr per sostegnir la regoeta de firmes tel Trentin e, en colaborazion con l Consei de la autonomie locales, a uzèr fora l'emportanza de la scomenzadiva, con

chela de dèr n contribut a sie bon ejit e al rinforzament de la mendranzes te l'Europa.

L President Dorigatti à ence tout sù la domana de Detomas de tor ite te la campagna de informazion ence l Consei provinzièl. La proposta de mozion é stata litèda a una, con gran sodesfazion del conseier ladin.

Per tor pèrt a la scomenzadiva l'é da scriver ite l modul on line al sit www.minority-safepack.eu. (cri.m)



L logo de la scomenzadiva "Minority SafePack".